

**Rješenje**  
**po Prijavi namjere koncentracije između privrednog subjekta ČEZ a.s. Prag 4, Republika**  
**Češka i privrednog subjekta Lumius, spol. s.r.o. Frydek-Mistek, Republika Češka**

**Sarajevo, oktobar, 2009. godine**

Broj: 01-05-26-023-5-II/09  
Sarajevo, 21.10.2009. godine

Na osnovu člana 25. stav (1) tačka e) i člana 42. stav (1) tačka d), u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05, 76/07 i 80/09), rješavajući po Prijavi namjere koncentracije privrednog subjekta ČEZ a.s., Prag 4, Duhová 2/1444, poštanski broj 140 53, Republika Češka i privrednog subjekta Lumius, spol. s.r.o. Frydek-Mistek, ul. Miru 3267, poštanski broj 73801 Republika Češka, podnesenoj od strane advokata Seada Miljkovića, Fra Anđela Zvizdovića 1, 71000 Sarajevo, zaprimljenoj dana 03. 07. 2009. godine pod brojem: 01-05-26-023-II/09, Konkurencijsko vijeće, na 96.(devedesetšestoj) sjednici održanoj dana 21.10.2009. godine, je donijelo

### **R J E Š E N J E**

1. Ocjenjuje se dopuštenom koncentracija na tržištu trgovine i snabdijevanja električnom energijom u Bosni i Hercegovini, koja će nastati sticanjem kontrole od strane privrednog subjekta ČEZ a.s., Prag 4, Duhová 2/1444, poštanski broj 140 53, Republika Češka, nad privrednim subjektom Lumius, spol. s.r.o. Frydek-Mistek, ul. Miru 3267, poštanski broj 73801, Republika Češka, kupovinom 100% udjela osnovnog kapitala.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je zaprimilo, dana 03.07.2009. godine pod brojem: 01-05-26-023-II/09 Prijavu namjere koncentracije (dalje u tekstu: Prijava) privrednog subjekta ČEZ a.s., Prag 4, Duhová 2/1444, poštanski broj 140 53, Republika Češka (u daljem tekstu: Podnosilac prijave ili ČEZ), kojom namjerava, steći kontrolu nad privrednim subjektom Lumius, spol. s.r.o. Frydek-Mistek, ul. Miru 3267, poštanski broj 73801 Republika Češka ( u daljem tekstu: Lumius), kupovinom 100% udjela osnovnog kapitala.

Podnosilac prijave je samoinicijativno dopunio Prijavu dana 27.07.2009. godine aktom broj 01-05-26-023-1-II/09.

Konkurencijsko vijeće je utvrdilo da je Prijava kompletna i uredna i izdalo Potvrdu o prijemu kompletne i uredne Prijave, dana 09.09.2009. godine, broj: 01-05-26-023-2-II/09, u skladu sa članom 30. stav (3) Zakona o konkurenciji ( u daljem tekstu: Zakon). Nakon toga Podnosilac prijave je dostavio dio dokumentacije dana 06.10.2009.godine, podneskom broj: 01-05-26-023-4-II/09.

Podnosilac Prijave je naveo da će podnijeti zahtjev za ocjenu koncentracije tijelima ovlaštenim za ocjenu koncentracije Republike Češke i Slovačke Republike, u smislu člana 30. stav (2) Zakona.

Konkurencijsko vijeće je, u postupku ocjene predmetne koncentracije, utvrdilo sljedeće činjenice:

Podnosilac prijave je Prijavu podnio u roku propisanom članom 16. stav (1) Zakona.

## **1. Učesnici koncentracije**

Učesnici koncentracije su privredni subjekt ČEZ a.s., Prag 4, Duhová 2/1444, poštanski broj 140 53, Republika Češka i privredni subjekt Lumius, spol. s.r.o. Frydek-Mistek, ul. Miru 3267, poštanski broj 73801 Republika Češka.

### **1.1. Privredni subjekt ČEZ**

Privredni subjekt ČEZ a.s., Prag 4, Duhová 2/1444, poštanski broj 140 53, Češka Republika, registrovan je u Trgovačkom registru Opštinskog suda u Pragu, odjel B pod brojem 1581 (identifikacijski broj: 452 74649), dana 06.05.1992. godine.

Pretežne djelatnosti privrednog subjekta ČEZ su: razvoj električne opreme, revizija električnih postrojenja, proizvodnja i distribucija električne energije, proizvodnja i distribucija toplotne energije i trgovina električnom energijom.

Privredni subjekt ČEZ je matično društvo ČEZ Grupe koja predstavlja jedan od najvećih elektrokonglomerata u centralnoj i jugoistočnoj Evropi.

ČEZ Grupa posjeduje i privredne subjekte u Njemačkoj, Poljskoj, Mađarskoj, Slovačkoj, Rumuniji i Bugarskoj.

#### **1.1.1. Povezana društva privrednog subjekta ČEZ u Bosni i Hercegovini**

U Bosni i Hercegovini privredni subjekt ČEZ ima većinski vlasnički udio u privrednom subjektu Nove elektrane Republike Srpske, društvo sa ograničenom odgovornošću za proizvodnju i prodaju električne energije, Gacko (u daljem tekstu: NERS Gacko) i privrednom subjektu ČEZ Bosna i Hercegovina d.o.o.Sarajevo (u daljem tekstu: ČEZ BiH).

Privredni subjekat Nove elektrane Republike Srpske društvo sa ograničenom odgovornošću za proizvodnju i prodaju električne energije, Industrijska bb, Gacko, Bosna i Hercegovina, upisan je u sudski registar Osnovnog suda u Trebinju dana 22. decembra 2006. godine, pod registarskim brojem: RU-1-1864-00.

Pretežna registrovana djelatnost privrednog subjekta NERS Gacko je proizvodnja i prodaja električne energije.

Privredni subjekat NERS Gacko je osnovan zajedničkim ulaganjem privrednog subjekta ČEZ sa 51% vlasničkog udjela i Mješovitog holdinga „Elektroprivreda Republike Srpske Trebinje – Matično preduzeće“ a.d. Trebinje sa 49% vlasničkog udjela u osnovnom kapitalu istog, a planirano je da započne sa svojim aktivnostima tek 2013. godine.

Privredni subjekt ČEZ Bosna i Hercegovina d.o.o. Sarajevo, Fra Anđela Zvizdovića 1, Sarajevo, Bosna i Hercegovina, upisan u sudski registar Opštinskog suda u Sarajevu pod matičnim brojem: 65-01-0142-08 dana 21.03.2008. godine, je u 100% vlasništvu privrednog subjekta ČEZ. Svoje poslovne aktivnosti započeo je početkom 2009. godine.

Pretežna registrovana djelatnost privrednog subjekta ČEZ BiH je proizvodnja i prodaja električne energije.

## 1.2. Privredni subjekt Lumius

Privredni subjekt Lumius, spol. s.r.o. Frydek-Mistek ul. Miru 3267, poštanski broj 73801, Republika Češka registrovan je u registru privrednih subjekata Okružnog suda u Ostravi, pod brojem No.25911945, sekcija C, dosije 27060, dana 26.06.2002. godine.

Pretežna registrovana djelatnost privrednog subjekta Lumius je trgovina i snabdijevanje električnom energijom i gasom.

Privredni subjekt Lumius snabdijeva električnom energijom kupce u regiji Centralne Europe.

Prema podacima iz Prijave, privredni subjekt Lumius ima četiri subsidijarna društva i to u Slovačkoj, Poljskoj, Mađarskoj i Hrvatskoj.

Privredni subjekt Lumius pojedinačno ili zajedno nema više od 10,0% udjela u osnovnom kapitalu, odnosno 10,0% prava glasa u nekom privrednom subjektu u Bosni i Hercegovini.

## 2. Obaveza prijave namjere koncentracije

Obaveza prijave namjere koncentracije privrednih subjekata, u smislu odredbi člana 14. stav (1) pod a) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu, iznose preko 100.000.000,00 KM, po završnom računu u godini koja je prethodila predmetnoj koncentraciji.

Ukupni ostvareni godišnji prihodi učesnika koncentracije (i njihovih povezanih privrednih subjekata) na dan 31.12.2008. godine iznosili su:

Tabela 1.

Ukupni prihod	ČEZ		LUMIUS	
	KM	CZK	KM	CZK
Svijet	(..)** <sup>1</sup>	(..)**	(..)**	(..)**
BiH	(..)*	-	-	-

Izvor: Prijava -\* Prihodi koje su ostvarili povezana društva ČEZ-a u BiH (NERS i ČEZ BiH)

Budući da su ispunili zahtjeve u smislu člana 14. stav (1) Zakona, u vezi zajedničkog ukupnog godišnjeg prihoda i da je najmanje jedan privredni subjekat sudionik koncentracije registrovan na teritoriji Bosne i Hercegovine, privredni subjekti sudionici koncentracije su obavezni podnijeti Prijavu.

<sup>1</sup> Podaci predstavljaju poslovnu tajnu u smislu člana 38 Zakona o konkurenciji

Godišnji prihod učesnika koncentracije predstavlja ukupan prihod (bez poreza na dodanu vrijednost i drugih poreza koji se direktno odnose na učesnike koncentracije, na svjetskom i na tržištu Bosne i Hercegovine), u smislu člana 8. tačka h) Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“, broj 95/06).

### **3. Pravni okvir ocjene predmetne koncentracije**

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», broj 18/06), te Odluke o načinu podnošenja prijave i kriterijima za ocjenu koncentracija privrednih subjekata.

### **4. Pravni osnov i oblik predmetne koncentracije**

Pravni osnov koncentracije propisan je članom 16. stav (1) Zakona, a u vezi sa članom 30. stav (1) tačka a) Zakona i članom 8. tačka f) alineja 3. Odluke o načinu podnošenja prijave i kriterijumima za ocjenu koncentracija privrednih subjekata.

Pravni osnov koncentracije je Ugovor o uslovima prenosa udjela, zaključen dana 25.06.2009. godine u Pragu, između privrednog subjekta ČEZ, kao sticatelja i privrednog subjekta Lumius kao prenosioca. Ugovorom se definiše uslovno sticanje 100% udjela u privrednom subjektu Lumius od strane privrednog subjekta ČEZ, po kome privredni subjekt ČEZ stiče pravo da kupi 100% udjela u privrednom subjektu Lumius, ukoliko se ispune određeni uslovi do 31.12.2010. godine.

Pravni oblik koncentracije je stjecanje kontrole od strane privrednog subjekta ČEZ nad privrednim subjektom Lumius, kupovinom većine udjela osnovnog kapitala, u skladu sa članom 12. stav (1), tačka b), alineja 1. Zakona.

### **5. Relevantno tržište predmetne koncentracije**

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta («Službeni glasnik BiH», broj 18/06) čini tržište određenih proizvoda/usluga koji su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Analizom relevantnog tržišta učesnika predmetne koncentracije Konkurencijsko vijeće je utvrdilo da je relevantno tržište proizvoda u predmetnoj koncentraciji tržište trgovine i snabdijevanja električnom energijom.

Relevantnim tržištem u geografskom smislu smatra se tržište Bosne i Hercegovine.

Slijedom gore navedenog, relevantnim tržištem predmetne koncentracije smatra se tržište trgovine i snabdijevanja električnom energijom u Bosni i Hercegovini.

## **6. Ocjena predmetne koncentracije**

Konkurencijsko vijeće je, nakon procjene i analize podataka i utvrđenih činjenica, u smislu člana 17. Zakona, u postupku donošenja Rješenja, ocijenilo da provođenje koncentracije na relevantnom tržištu neće imati direktnog uticaja na tržište trgovine i snabdijevanja električnom energijom niti će doći do promjene tržišnih udjela na relevantnom tržištu.

Prilikom ocjene predmetne koncentracije, Konkurencijsko vijeće je imalo u vidu i činjenicu da se u konkretnom slučaju radi o eksteritorijalnoj koncentraciji obzirom da učesnici koncentracije djeluju na svjetskom nivou, te da predmetna koncentracija može imati uticaja na tržište Bosne i Hercegovine preko djelovanja povezanih privrednih subjekata u vlasništvu privrednog subjekta ČEZ.

Iz gore navedenih razloga, Konkurencijsko vijeće smatra da se predmetnom koncentracijom privrednih subjekata ne stvara i ne jača dominantan položaj na relevantnom tržištu, te je odlučilo kao u dispozitivu ovog Rješenja.

Uzimajući u obzir sve iznesene činjenice i podatke koji su prethodili donošenju Rješenja, Konkurencijsko vijeće je ocijenilo koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

## **7. Administrativna taksa**

Na ovo Rješenje Podnosioci prijave, u skladu sa članom 2 stav (1) tarifni broj 107 tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) dužni su platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

## **8. Pouka o pravnom lijeku**

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovoga Rješenja.

**Predsjednik**

**dr. Stjepo Pranjić**

### **Dostaviti:**

- 1. Podnosiocu prijave**
- 2. U spis**
- 3. Arhiv Konkurencijskog vijeća**